

Kiristoos Yisa Tarjamonnante Kinin Yittsaa Bhawloos Galatia Eenana Kinin Thaapoono Warqanno

Ardinta

Bhawloos ko warqatinam haa kinin thaaponam dhesana damimehe. Waani waani eeno Bhawloos dhacchintan upsinaam birayse giyota yinin yivon raqira Anthokia katamandar maatate nivaa hamayse 40-41 levensa iinte ki thaapade koda hame; waani eeno tapir 47-50 levensa iinte ki thaapade koda hame.

Galatia Likkon Isiya peente ko dahade. (Ta wodanka Likkono Isiya “Turk peeno” koda hambhe.)

Kaa mathaapaam raq dongdar kashana dandima ko dandime:

1. Nagaymakkobee wacimebe (1:1-10)
2. Bhawloos sadan kinnonna Barjoyn kina hayonam giyaate Barjosa dhacchintan upsino gon konin dohonam kinin giyoono (1:11–2:21)
 - a) Kiristoos Bhawloosna haapadhayse Barjosa dhacchintan upsinaam kinin giyoono (1:11-24)
 - b) Waani Kiristoosin tarjamonnante yittsaana eena Bhawloosin giyen dhacchintan upsinaam gonne hamayse kenin tarjoono (2:1-10)
 - c) Barjosa dhacchintan upsino Bhawloossa sadante hamin konin waadadhoono (2:11-21)
3. Bhawloos Mathaap Gazara Barjosa dhacchintan upsino gon konin dohonam kinin giyoono (3:1–4:31)
 - a) Galatia gidir dahaana Barjodar woylamin qajaana eenayn tiyoono dhacchintan upsino (3:1-5)
 - b) Abraamsa eerino (3:6-14)
 - c) Barjodar qaabe haydhen upsinbee Museesa yigginbe (3:15-22)
 - d) Naasa toydia naasi ki daaka (3:23–4:7)

- e) Gonin hamon dhacchintan upsinkala pegadhano siya konin dohoono (4:8-20)
- f) Edon worshonsa naasabee worshotay hamon edonsa naasabesa kamsino (4:21-31)
4. Bhawloos eedisa meskena may maaten yerinka dhacchintan upsino gon konin dohonam kinin giyoono (5:1-6:10)
5. Macchin kiilimenbee nagaymakkonbe (6:11-18)

Bhawloos kaa warqatasa iinte nagaymakkonam gudubhsima saanawa yisa bhocchinam giyada paliman ki yedade. Galatia gidir dahaana eena Barjodar woylamin kenin qajonbee Bhawloossa timmirinbeam saanawa garota kenin qaabenka Bhawloos ki targadhade. Barjosa dhacchintan upsinar oookota zagayna eenaam ki ashade. Kinin ashonsa goyti daane:

1. Bhawloos dhacchintan upsinar kinin tiyoono Kiristooskalkane, eedikalankatehe. Waani Kiristoosin yittsaana kiam keedhada kimbessana kinka ke wormade. Ogonante kinin giyayno dhacchintan upsino gon hammone.
2. Barjosa dhacchintan upsino Ena Mallante thaapadhidine (3:8). Musesa yiggin imbhima birayse Abraam Barjodar woylam qajintaka tipamonam ki haapade. Yiggi hayyeamaaraa tipa maasehe (3:9-14). Bhawloos oogoam kamsika kida dhettse (3:23-4:31).
3. Eedi Barjosa dhacchintan upsinar waadimandar kinin hacchenka, seesora utintanam kida haape; waansa anngarmanam kida basha; payyan waadimanam waadadhana dama ki dame. Ogono wul yin konin maatayno Barjodar woylam qajaa easa iinte Manpas Gazanin waadadhennane (5:25).

Ogonante Bhawloos birayse kinin thaapon Galatia mathaapinte tipamonam hamin wonin haapenam may kida giye. Seeson ea Barjodar woylamin yinin qajenka, Barjosa birante tipamonam haapinta bish dayma, sadante kisa dahayno Manpas Gazano Barjosa waadimanam kinin waadadhoadettsi koda wocchinse.

1 ¹Eenkalanka way eedika dayma Yesu Kiristoosbee dembhira kiam dhaasaa Barjo Imbaabe goynsa, Kiristoossa tarjamonnante nittsadhaa i Bhawloosbee ²imbesana kinka dahaana imbanaana wulbekalanka, Galatia peente dahaana misken onnana nittsadhoono warqannone. ³Wosa Imbaa Barjabee wo wulsa Imba maataa Yesu Kiristoosbesa sunin imintonbee payyamonbe yena ko dee.

⁴Ta ko siyon wodara woam dhacchanna wosa Imba maataa Barjosa bhocchinka Kiristoos wosa seesonna hamayse yiam dembhinna ki imade. ⁵Ogonante Barjona rooro wul lay gobshi ko dee; amiin.

Gonin Hammo Barjosa Dhacchintan Upsino Kalaa Bish Konin Dohoono

⁶Kiristoossa sunin imintonka yeama eelaa Barjokalanka waani dhacchintan upsindar saanawa yenin maatayno kattsii iam ko tarshade.

⁷Ko dahaannaar Barjosa dhacchintan upsira ab dhacchinta upsi

qolehe. Ogonoar “waani dhacchintan upsino” hamayse inin giyoono yeam dhaddhisana Kiristoossa dhacchintan upsinaam ookana zagayna waani waani eena kenin dohonnane. ⁸Wodi wo hannaar, way cecinsa gaana ki hannaar, wonin yena giyon Barjosa dhacchintan upsindara ab dhacchintan upsi yena giyea ki hanna, ashadhaa ki dee. ⁹Kosa birayse wonin giyondettsi, pir yena ida giye: Qansayse gonne hamayse yenin tiyon Barjosa dhacchintan upsindara ab dhacchintan upsinaam hayyear yena giyea ki hanna, ashadhaa ki dee.

¹⁰Ta keeda inin zagayno eedi iam shawkoadettsimoo? Barjo iam kinin shawkoadettsiw? Way eenam wozisana inin waadadhea yena ko maato? Ta keeda eenam wozisana waadadhea i hanna, ini Kiristoossa waadima eedi maatattine.

Bhawloos Barjosa Dhacchintan Upsinna Kinin Eldhoono

¹¹Imbanaanato, inin yena giyon Barjosa dhacchintan upsino eedisa dhalq konin dahaamonam yena ida dhettse. ¹²Harrna hambhidianna, ina dhahaa Yesus Kiristooskala koam i tiyade; eedi haykalaar inta tiyaatine, way eedikala koam dhesaatine.

¹³Ena Ayiwd eenin bulon dambinka hamin inin dohonam yedi qansidine. Ogonoar Barjodar woylamin qajaynaam kaysana kattsi keam oytayte i dahade. ¹⁴Ayiwd eensa dambinam toolintaka isa aanamo maataana thoothina Ayiwd eenadara sagayda sage; wosa eykenasa dambin goynka kedara sagi ida wocchimbhe.

¹⁵⁻¹⁶Ko dahaannaar inin adhadhonsa birayse iam kamaa, yisa sunin imintonkaar iam eelaa Barjo Ayiwdtay hamma eenana kisa Naasasa dhacchintan upsinaam inin giyoadettsi yisa Naasaam inka dhaana kinin nashon wodanka, inta haybesanaar dhalqaatine. ¹⁷Isa birayse Kiristoos yisa tarjamonnante kinin yittsaanakal Yerusaalem yivaatine. Ko dahaannaar Areb peendar i yivade; pir Demasqo katamandar maatate i nivade. ¹⁸Ogora leve makkamsa budonte Bhethiroosbesana^a kinka dhalqana Yerusaalem katamandar yivayse kimbessana kinka tabhi dong rooro i dooqade. ¹⁹Ko dahaannaar Imba wontea Yesussa indanaasa Yayqoob bishkalanka waani Kiristoos yisa tarjamonnante kinin yittsaana eenasa shaarira hayyeamaa haapaatine. ²⁰Ogonoar inin yena thaapayno yerro buuda konin dahaamonam Barjo birante yena ida giye.

²¹Ogosa budonte Sooria peenbee Kilqia peenbe i yivade. ²²Ogo Yiwda peente misken onnar dahaana Kiristoosdar woylamin qajayna iam haapayse dhesehe. ²³Ko dahaannaar kedi kenin qansayno “Birayse woam oytea ea agaa kaysana yinin zagen Barjodar woylamin qajadhen goynam

^a **1:18:** Bhawloos yinin thaapenka, Sooria aponka “Keepa” hamayse ki thaapade; “Keepa” hamintano “Bhethiroos” hamintane.

eeno gonne hamayse konin tiyoadettsi kida giye” hamen upsinam ke qansade. ²⁴Innon goynka Barjoam ke gobshade.

**Bhawloos Kiristoosin Yisa Tarjamonnante
Yittsaanakal Kinin Dhesadhoono**

2 ¹Ogora leve tabhi oydisa budonte Barnabaasbesana Yerusaalem katamandar lansi maatate i yivade; Tiitoam imbesana kiam entsate i yivade. ²Inin yivoonoar Barjo ina kinin dhohon goynkane. Ena birayse inin waadadhonbee ta inin waadadhenbe sun konin shidhoamadettsi hamintaka, Ayiwtdtay hamon eenna inin giyoono Barjosa dhacchintan upsinam misken onnasa gembha entsaynana bish i dhettsisade. ³Ko dahaannaar imbesana kinka yivaa Tiito, Girik eedi ki dahaakaar, qaama kinin taxadhoadettsi kiam haydhadehe.

⁴Dhalqa agaanin dhaabhoono buudamoka “Wodi imbanaana yennane” hamayna waani waani eena wosa shaarinte dimmakkoka kenin ardonnane. Kedi Yesus Kiristooska baza qolma wonin haapon payyamora woam bulayse worshamondar woam maasana ke qaabade. ⁵Wodiar gon maatoono Barjosa dhacchintan upsino yenka wocchimbhayse konin doadettsi likka wodana hattear kena ee hamootone.

⁶Igina misken onnasa gembha entsana maatayse haapadhayna ke hanna, Barjo eedisa woti shedayse kinin pirdiminna kesa gembhakono ina yer kalaar konin hayea qolehe. Igina gembha entsaynane yiam hambhayna inin giyondar yer kala hattear arsadehe. ⁷Ko dahaannaar Barjo Bhethiroosam Ayiwd eenna yisa dhacchintan upsinam ki giye kinin hayondettsi, iamaar Barjosa dhacchintan upsinam Ayiwtdtay hamon eenna inin giyoadettsi kinin hayonam ke haapade. ⁸Bhethiroosam Ayiwd eenna Kiristoossa tarjamonnante kinin yivoadettsi hayaa Barjo iamaar Ayiwtdtay hamon eenna inin yivoadettsi ki hayade. ⁹Taar misken onnasa gebhi maataana entsana Yayqoobbee, Bhethiroosbee^b, Wannisbe Barjo waadiman koam ina kinin imonam yinin dheson wodanka, wombessana kinka kalaa yinin maatonam dhaana yisa anna mizanqaam imbee Barnabaasbena ke imade. Wodi Ayiwtdtay hamma eenakal yivana, kediar Ayiwd eenakal yivana, kinka wo dhalqade. ¹⁰Kesa shaarinte dahaana qambhinaam wonin kelshoadettsi bish wona ke elqimade; ogoamaar birara yedayse wozaka hayte inin dohoono waadimane.

Bhawloos Anthokia Gidir Bhethiroosam Kinin Wacimoono

¹¹Bhethiroos Anthokia katamante kinin nivon wodanka, kisa seesono may konin dohonna kidar wotika keerayse kiam i wacimade. ¹²Harrna

^b 2:9: Bhawloos “Bhethiroos” yinin thaapenka, kisa naabenam Sooria aponka “Keepa” hamayse ki thaapade. Pir paydi 11bee 14bedar agaadettsi ki thaapade.

hambhidianna, Yayqoobin yittsaana waani waani eena Anthokia katamante kenin nivonsa birayse, Bhethiroos Ayiwtday hamma eenabesana kinka gala kida itse. Kenin nivonsa budonte, “Ayiwtday hamma eena yisa qaamanaam taxadha keam koda zaské” hamayna Ayiwd eenaam kurtumbhayse budoka yivayse Ayiwtday hamma eenakalanka ki edimade. ¹³Ogote dahaana waani Ayiwd eena wulaar Bhethiroossa maltamonsa iinte kimbessana kinka ke ardade; Barnabaasaar kesa maltamonka ki tiidhade.

¹⁴Kesa waadimano Barjosa dhacchintan upsinbesana gon konin maatinam i haapaysaka, Bhethiroosna “Ya Ayiwd eedi dahayse Ayiwd eensa dambinka dayma Ayiwtday hamma eensa dambinka ha dahade. Ta keeda Ayiwtday hamma eena Ayiwd eensa dambinka kenin doadettsi haminaa keam kantise?” hamayse een wulsa birante kiam i wacimade.

Eedi Wulin Dhaqayno Barjodar Woylamin Qajintaka Konin Dohoono

¹⁵Wodi wosa adhadhinka Ayiwd eedine; Ayiwtday hamma seeson eenatehe. ¹⁶Ko dahaannaar eedi Barjo birante tipa eedi konin maatayno Musesa yigginam toolintaka dayma, Yesu Kiristoosdar woylamin qajintaka konin dohonam dhesooda dhese. Ogona wodi Musesa yigginam toolintaka dayma, Kiristoosdar woylamin qajintaka Barjo birante tipana eena wonin maatoadettsi Yesu Kiristoosdar woylamin wo qajade. Harna hambhidianna, eedi hayyear yigginam toolintaka Barjo birante tipa eedi maatehe.

¹⁷Kiristooska Barjo birante tipana eena maataana wonin zagenka, wosa metenka seeso eedi maataayse wonin haapadhenna, ta keeda Kiristoos seesonam wonin waadadhoadettsi woam hayeane hamintaw? Yintehe! ¹⁸Inin kottson yigginam maasate woysa i hanna, ta keeda inta yigginam toolima inin maatenam ida dhettse. ¹⁹Harna hambhidianna, inta Barjona daana yiggin goynka dembhika edimaadettsi yigginakalanka inta edimidine. ²⁰Inta Kiristoosbesana inin ziidhaadettsi, keeda kaara os Kiristoos inka kida dee, inta isa metenka dahattine. Ta keeda waanka inin dahayno iam nashaa, ina hamayse dembhina yiam saskate imaa Barjo Naasadar woylamin qajintaka ida dee.

²¹Inta Barjosa sunin imintonam dhabattine. Eedi Barjo birante tipa konin maatayno yigginam toolintaka ko hanna, ini Kiristoos sun ki diyade hamintane.

Eedi Yigginam Toolintaka Tipa Konin Maatimino

3 ¹Yedi malgimina Galatia eenato, palpalan yena hayaa hayne? Yesu Kiristoos masqalindar konngate ziidadhayse yesa birante may haapadhite ki dahade. ²Yer kalaa bish yekalanka dhesana ida zage: Yedi Manpas Gazanam yenin tiyoono yigginam toolintakamoo?

Barjosa upsinam qansayse kidar woylamin qajintakaw? ³Koka yekka yedi malgiminaw? Barjo Manpasinka yedayse ta keeda yesa waanka ye maccho? ⁴Barjosa dhacchintan upsin goynka yenin tiyoono gaaleno sun ko shidho? Yin ye haydianna, gon sun shidhasane! ⁵Ta keeda Barjo Manpasin yinnonam yena kinin imenbee, yesa shaarinte tarshen waadimanam kinin waadadhenbe yigginam yenin toolennamoo? Barjosa upsinam qansayse kidar woylamin yenin qajennaw?

⁶Yinda kamsina Abraamam shedee: “Kidi Barjodar woylamin ki qajade; ogonante Barjo kiam tipa ea hamayse ki paydade”^c hamayse Mathaap Gazante thaapadhidine. ⁷Ta keeda Barjodar woylamin qajayna Abraam naana kenin maatonam dhese. ⁸Mathaap Gazante Barjo Ayiwday hamma eena kidar woylamin kenin qajenka tipana eena keam kinin hayenam shedayse, “Eeno wul hanka gobshadha ko gobshadhe”^d hamayse birayse Abraamna Barjosa dhacchintan upsinam ko giidhade. ⁹Ogonante Barjodar woylamin qajayna eena Barjodar woylamin qajea Abraambesana kedi gobsha ke gobshadhe.

¹⁰“Yigginam toolintaka ida dhaqe” hamayna wul ashadhaanane. Harna hambhidianna, “Musea yiggin mathaapinte thaapadhon upsin wulam wocchimbhayse toolimina wul ashadhaanane”^e hamayse thaapadhidine. ¹¹“Tipa ea Barjodar woylamin qajintaka sadaka kida dee”^f hamayse Mathaap Gazante konin thaapadhonna, eedi hayyear yigginam toolintaka Barjo birante tipa ea kinin maatinimo mayne. ¹²Yiggin Barjodar woylamin qajintandar woyoonotehe; ogodettsi “Yigginam toolea ea sadaka kida dee”^g hamayse thaapadhidine.

¹³“Haaqandar ziidadhayse diyaa wul ashadhaane”^h hamayse konin thaapadhonna, Kiristoos wona hamayse ashadhaa kinin maatenka yigginsa ashimera woam ki dhacchade. ¹⁴Ogonoar Barjo Abraamna imana kinin giyoono Yesus Kiristoos goynka Ayiwday hamma eenana konin yeskoadettsine. Kiristoosin diyoono Barjo “yena imayda ime” kinin hamon Manpas Gazanam kidar woylamin qajintaka wonin tiyoadettsine.

Yiggin Barjodar Qaabe Haydhen Upsinam Konin Shiishimino

¹⁵Imbanaanato, ta dhalqin koam eedin hayen yerinsa kamsi hayayse ida yena giye: Eedi kalaa malla kinin ardonasa budonte, eedi hayyear koam shiishea way daran arsea qolehe. ¹⁶Barjo Abraamna “Hambee hasa muldhaabena imayda ime”ⁱ ki hamade. Ogono upsinoar thoothi eedi hayayse “hasa muldhanana” hamehe; ko dahaannaar eedi kala hayayse “hasa muldhaana” koda hame. Ogonoar “hasa muldhaana” hambhoono “Kiristoosna” hamintane.

^c 3:6; Pija 15:6. ^d 3:8; Pija 12:3. ^e 3:10; Yiggi 27:26. ^f 3:11; Imbaqom 2:4.
^g 3:12; Lewi 18:5. ^h 3:13; Yiggi 21:23. ⁱ 3:16; Pija 12:7.

¹⁷Ta keeda inin giyayno mato oydibee eedi kalaa kaysa apo tabhibe (430) levesa budonte imbhoono yiggino Barjo mallayse kinin woyson upsinam shiishintaka Barjodar qaabe haydhen upsinam kaysana damehe.^j
¹⁸Barjo wona kinin imenam wonin tiyayno yigginka ko hanna, Barjodar qaabe haydhen upsinka ini haapadhehe. Ko dahaannaar Barjo Abraamna yidar qaabe haydhen upsinka ki imade.

Yigginisa Qaabono

¹⁹Ta keeda yigginam harrna ko imbhaa? Yigginam imbhoono qaabe yindar haydhen upsinam yina imbhaa Abraam muldhaayn nivenka yekka seeso har konin dohonam dhettsanane. Yigginin imbhoono Barjosa gaananakane; Barjabee eenbesa shaarinte dahaa Muse goynka ko nivade.
²⁰Kesa shaarinte dahayse keam qaashinsea ea eena lamaanana kida waadadhe; kalaana bish waadadhehe. Barjo kidi kalaane.

²¹Ta keeda yiggino Barjodar qaabe haydhensa upsinam jibba ko jibbo? Jibbehe! Harrna hambhidianna, sada imana damea yiggi imbhidi ko hanna, gon Barjo birante tipamo yiggin goynka ini haapa ko haapadhe.
²²Ko dahaannaar Yesus Kiristoosdar woylamin qajintaka haapadhayno Barjosa upsino kidar woylamin qajaynana konin imbhoadettsi, Mathaap Gazano peendar dahaana eena wul seeson hayamonsa demente ke dahade koda hame.

Barjo Naana Wonin Maatayno

²³Kiristoosdar woylamin qajintanin nivonsa birayse yigginka dhaxadhaana maatayse wo dahade; Kiristoosdar woylamin qajintanin dhesimenka yekka yigginisa demente wo dahade. ²⁴Ogodettsi yin Kiristoosdar woylamin qajintaka Barjo birante tipana eena wonin doadettsi yiggino Kiristoosdar woam yeskisota gettsea eedidettsi ko maatade. ²⁵Ta keeda Kiristoosdar woylamin qajintanin nivonna, keeda kaara os kidar woam yeskisea waadiman easa hayamon demente wonin dahayno shidhidine.

²⁶Yedi wul Yesus Kiristoosdar woylamin qajintaka Barjo naana ye maatade. ²⁷Harrna hambhidianna, Kiristoosbesana kinka kalaa maataana yenin shiidhenka, yedi wul Kiristoosam qaadhidine. ²⁸Yedi wul Yesus Kiristooska kalaa yenin dohonna, Ayiwd eenbee Girik eenbesa shaarinte, pir worshobee worsho maataamma eenabesa shaarinte, pir anngibee maabesa shaarinte edime qolehe. ²⁹Ta keeda yedi Kiristoossa ye daana, yedi Abraamsa muldhanane; Barjoar Abraamna “imayda ime” kinin hamon upsinam yedi tiyaynane.

4 ¹Ta inin giyayno yinne: Toydia naasa likka yinin dohonka, koymo wulsa imba yi dahaakaar, eedina waadadheadara yer

harkaar edimehe. ²Kidiar imbayn kina giyon wodanin yeskenka yekka gettsaynabee wottsaynabesa demente ki dahade. ³Ogodettsi wodi akar naasi wonin dohonka, peen ko gilonka wodhayna wo maatade. ⁴Ko dahaannaar Barjo yinin bhocchon wodan yeskaysaka, Naasa yintiam peendar ki nittsade. Kidiar maakalanka adhadhaa, yigginka wodhea ki dahade. ⁵Ogoam yin kinin hayoono wodar dohon bazanam kashayse yigginka wodhayna woam dhacchanabee Barjo naana hayanabene. ⁶Kisa naana yenin dohonna, yedi Barjoam “Baaba, Imbo” hamayse yenin eeloadettsi haysen yisa Naasasa Manpasinam yesa woynamindar ki nittsade. ⁷Ogonante yedi Barjo naanane, keeda kaara os worshonatehe. Barjo naana ye daana, Barjosa toydina naanane.

Bhawloos Galatia Eenana Kinin Gaaloono

⁸Kosa birayse Barjoam yenin dhesimon wodanka, pijadhinsa barjo maatumina yerrana worsho maatayse ye waadadhade. ⁹Taaki Barjoam yedi dhesidine; kalon Barjo yeam dhesidine. Ta keeda igina kantaysa qolminabee pootiminabe peen ko yiggindar haminee maate? Tapir kena worsho maatana zagee zago? ¹⁰Waana maataana rooronabee, arpinabee, wodanabee, levenabeam payya hayayse yeda gobshe. ¹¹Yena sun i qajadhaaw? Iam yenno goyno kurtunsa ko kurtunse.

¹²Imbanaanato, inta yedettsi inin maatonna, yediar idettsi maatee hamayse yeam ida miske. Yedi yer kalaaka hattear iam geneetene. ¹³Birayse Barjosa dhacchintan upsina yena giyana baali inin haapoono burqadhayse yekal inin dohon wodanka konin dohonam dheseeda dhese. ¹⁴Hamin ko dahaakaar isa burqono yeam galshea ko maataakaar, yedi iam toozadhayse jibbeetene. Barjosa gaanadettsi, pir Yesus Kiristoosdettsi hayayse iam ye tiyade. ¹⁵Ogo wodanka yesa dohoono wozano hamote ko dahaa? Ogo wodanka ye damidianna, yesa aapinam hattear bulayse ina yenin imenam inta yena tarjayda tarje. ¹⁶Ta keeda goninam yena inin giyonna yeam jibbea maatayse i haapadhaaw?

¹⁷Waani eena yeam yidar maasana wocchimbhayse keda zage. Ko dahaannaar kenin zagayno payyanatehe; kedi yeam wokala edayse yidar bish maasana keda zage. ¹⁸Ko dahaannaar yekal inin dohonka bish dayma, rooro wul yer payyana zagadhayna ye hanna payyane. ¹⁹Isa naanato, Kiristoos yesa iinte kinin haapadhenka yekka pir iam yena adhima burqodettsi yedidine. ²⁰Taaki yembesana kinka daanabee ta isa dohon bhocchinam ookanabe i zagade. Harnna hambhidianna, yennon goynsa har haya iam konin zaskenam inin dhesaamonna ida gaale.

Aggarbee Saarabesa Kamsino

²¹Yedi yigginisa demente daana zagayna eenato, yinda ina giyee: Yigginin giyenam qansattenu? ²²Abraamsa naana lamaa kenin

dohondettsi, kalaa edon worshonsa naasa, lansoa pir worshotay hamon edonsa naasa kinin dohonam Mathaap Gazante thaapadhidine. ²³Ko dahaannaar edon worshonsa naasa eedin adhadhendettsi waan bhocchika ki adhadhade; worshotay hamon edonsa naasa Barjo “imayda ime” kinin hamon qaabeyn haydhenka ki adhadhade.

²⁴Ogono dhalqino kamsine. Igina maana lamaana mallana lamaanasa kamsine. Birayse Siina dhukandar imbhon mallansa kamsino Aggarne; kodi naanaam konin adhayno worshamonnane. ²⁵Aggar Areb peente dohon Siina dhukansa kamsine; kodi taaki dohon Yersaalemdettsi koda maate. Harrna hambhidianna, Yersaalembec kosa naanabe worshamonte ke dahade. ²⁶Cecinte dohoono Yersaalem worshotay hammone; kodi wosa indane. ²⁷Harrna hambhidianna,
 “Ya naasi adhayse dhesimino seekino edono, wozadhaa!
 Ya adhiman burqon dhesimino, ililsayse ilataa!
 Geshoaysa dohon mayndara sagi
 geshoayn garon edonsa naana ke thoothade”^k

hamayse ko thaapadhade.

²⁸Imbanaanato, yedi Yisaaqdettsi Barjo “imayda ime” kinin hamon qaabeyn haydhenka adhadhaana naanane. ²⁹Ko dahaannaar ogo wodanka waan bhocchinka adhadhaa manpasinka adhadhaam kinin oytondettsi, taar ogodettsi ko maatade. ³⁰Ko dahaannaar Mathaap Gazano hamin ko giye? “Edon worshonbee naasabeam bulate oytaa. Harrna hambhidianna, edon worshonsa naasa worshotay hamon edonsa naasabesana kinka toydimehe”^l koda hame. ³¹Ogonante imbanaanato, wodi worshotay hamon edonsa naanane, edon worshonsa naanatehe.

Kiristooska Haapadhayno Nathamono

5 ¹Kiristoos worsho wonin dohorra woam kinin buloono natha wonin doadettsine. Ogonante wocchimhayse woyee, tapir worsho maateebhode.

²Marrato! Inta Bhawloos yena ida giye: Yesa qaamanam taxadhoadettsi yenin ee hamenna, Kiristoos hamin ko dahaannaar yena pootehe. ³Qaama taxadhana ee hamayna wulna tapir yena ida giye: Musesa yiggin wulam toola yeam koda zaske. ⁴Yedi yigginam toolintaka Barjo birante tipa maatana zagayna eena Kiristooskalanka edimayse Barjosa sunin imintora yedi pegadhidine. ⁵Wodi Barjosa Manpasinka Barjodar woylamin qajintaka “Barjo yisa birante tipana eena woam kida maase” hamayse qaabe hayayse woda toole. ⁶Harrna hambhidianna, Yesu Kiristooska wona pootayno Barjodar woylamin qajayse nashimmakkoka waadadhintane; qaama taxadhintabee taxadhima garintabe wona pootehe.

^k 4:27; Isi 54:1. ^l 4:30; Pija 21:10-12.

⁷Ta koka yekka payyaka yivite ye dahade; ta keeda goninna yenin ee hamoamadettsi yeam maraa hayne? ⁸Ogodettsino taysimeno yeam eelaa Barjokalankatehe. ⁹“Likkono irshono taapan wulam koda ocche” hambhondettsine. ¹⁰Yer waaniam hamin ko dahaakaar, yenin qaaboamadettsi inta Imbaa wontea Yesuska yedar woylamin inta qajidine. Yeam dhaddhisea hay ki hannaar, pirdinam yidar kida tiye.

¹¹Imbanaanato, inta ta koka yekka “Dhaqana qaamanam taxadha koda zaske” hamayse i giyna, ta koka yekka harrna i oytadhaa? Yin ko hanna, Kiristoossa masqalindar ziiadhayse diydinsa inin giyoono goa konin maatayno shidhidine. ¹²Ta keeda yeam dhaddhisayna eena qaamaam taxadha bish dayma, buu ke maate ida zage.

¹³Imbanaanato, nathamona ye eldhade. Nathamono yenno waan anngarmanam yenin thoosea hayeebhode; yin yenin hayerra kinka kinka nashimmakkoka kina waadadhee. ¹⁴Harrna hambhidianna, “Een wulam hadettsi hayayse nashaa”^m hamea upsi kalaaka yigginno wul ko thoothade. ¹⁵Ko dahaannaar kinka kiam kiam gavaynabee kiam itsaynabe ye hanna, kiam kiam yenin kaysoamadettsi mete yesaam gishee.

Manpasbee Waabe

¹⁶Ta keeda inta yena ida giye: Manpasinka dehee; waansa anngarmanam hamin ko dahaakaar hayeebhode. ¹⁷Harrna hambhidianna, waano Manpasindar, Manpasinoar waandar koda dhaabhe. Kinka kinka kiam kenin jibbenna, yenin zagenam hayana damattene. ¹⁸Manpasin yeam entsendettsi ye yivina, yigginna demente dahattene.

¹⁹Waan waadimanoar dhesadhoonone; ogonoar sharmucimakko, minngamo, tagach, ²⁰aaninka ashkadhaana barjonana goodime, palpala haynta, jibbinta, palime, wooginta, waciminta, yibishiam nashinta, edime, kikalanka kashimayse kidar dhaabhinta, ²¹eedi yeram anngardhintaa, bardhintaa, warsa, iginadettsinane. Birayse yena inin giyondettsi pir yena ida giye: Ogodettsin hayayna Barjosa bitamonam tiyehe.

²²Manpas Gazansa aapino nashimmakko, woza, payyamo, darshintaa, lemmakko, eedina payya haynta, gonamo, ²³payya eedi maatainta, yisa metenam wottsintane. Iginadettsina yerraam marea yiggi qolehe. ²⁴Yesus Kiristoossa maataana eena waanam kosa qaabonbee anngarmanbesana kedi masqalindar ziiatayse deesidine. ²⁵Barjosa Manpasinka dahaana wo hanna, ogo Manpasinka wo yaaye. ²⁶Kinka kinka kidar dhaabhintaka way woogimbheka sun wo erimabhoode.

^m 5:14: Lewi 19:18.

Wodi Waa Waasa Baskenam Wonin Baskayno

6 ¹Imbanaanato, eedi kalaa seensansa iinte ki dahaysaka ye haapidianna, yedi manpasinka dahayna eena ogodettsin waadadhea eam lemmakkoka maasee. Yaar pir ogodettsinka hanin taysadhoamadettsi mete hasaam gishaa. ²Yesa iira waa waasa baskenam ki baske; yin hayada Kiristoossa yigginam yeda toole. ³Eedi hayyear waani eendara kinin sagea yer qolma “Inta sagine” hamayse ki qaabina yiam kida tayse. ⁴Ko dahaannaar eedi wul yisa waadimanam marmarayse ki shede. Ogosa budonte yiam waani eenbesana yeekinsate shedota dayma, yisa meteka yinin erimen yerinam kida haape. ⁵Harrna hambhidianna, eedi wul yinnon baskenam koda baske.

⁶Barjosa upsinam timmiree ea payyan yerin wulam kiam dhettseabesana ki kashime.

⁷Yeam dhaddhiseebhode; Barjo bagadhehe. Eedi yinin yiithonam koda buure. ⁸Waan yinnonam wozisota yiithea waanka dembhinam kida buure; Manpas Gazanam wozisota yiithea Manpaskalanka rooro wul lay dehen sadanam kida buure. ⁹Qaabe wonin hayenam garma wonin wocchimbhenna, kosa wodanka koam wonin buurena, payya waadimanam hayana wo boosimabhoode. ¹⁰Ta keeda waadadhana goyti haapidi wo hanna een wulna, kalon Barjodar woylamin qajaynasa oonin eenana payyan waadimanam wo haye.

Macchin Kiilimeno

¹¹Ta hamin dahaana gembha pidallaka koam isa aanka yena inin thaaponam shedee. ¹²Mayante payya maatayse haapadhana zagayna eena yesa qaamanaam yenin taxadhoadettsi yeam keda kantise; ogoam kenin hayayno Kiristoos masqalinsa oytaydha kedar yeskoamadettsi hamaysene. ¹³Kedi yesa waanka erimana hamayse yesa qaamanam yenin taxadhoadettsi keda zage; qaaman taxadhaanaar Musesa yigginam toolehe. ¹⁴Intaar wosa Imbaa Yesus Kiristoos masqalinalanka ab inin erimee yer ikalanka ko pegadhe. Ko masqalinka peeno kono ikalanka, intaar peen kokala dembhika edimadhendettsi edimidine. ¹⁵Haali pijadhi maaintano koda poote; qaamanaam taxadhabee taxadha garabe pootehe. ¹⁶Bhocchin ogoka entsadhayna wulbee Barjo eedi maataana Israveel eenabena payyamobee garintobe kena ko dee.

¹⁷Isa waandar dohoono madano Yesussa waadima eedi inin dohonam konin dhehenna, ta keeda kaara os eedi hayyear iam ko galshabhoode!

¹⁸Imbanaanato, wosa Imbaa Yesus Kiristoossa sunin imintono yembesana ko dee; amiin.